

Bualu bua Diulu

Malu adi disu kadiyi dianze kutangila, ne ditshu kadiyi dianze kumvua, adi kayi manze kubuela mu mutshima wa muntu, malu onso akalongoluela Nzambi badi bamunanga.

(1 Kolinto 2:9)

Ne bobo ne bikale bantu bende; ne Nzambi muine neikale nabo, neikale Nzambi wabo. Yeye neakupule tshinsonshi tshionso ku mesu kuabo; ne lufu kaluena luikalaku kabidi; madilu kaena ikalaku kabidi, nansha muadi, nansha kanyinganyinga kabidi; malu a kumudilu akumuka. Yeye udi ushikama pa nkuasa wa butumbi, wakamba ne, Mona, ndi nvuija bintu bionso bipia-bipia. Yeye wakuamba ne, Funda; bualu bua meyi aa adi meyi a kueyemena ne malelela. Yeye wakangambila ne, Akuenjibua. Meme ndi A ne Z, tshibangidilu ne nshikidilu. Nempe udi ne nyota mayi a ku mushimi wa muoyo tshianana. Udi upita bukole neapiane bintu ebi; meme nengikale Nzambi wende, ne yeye neikale muana wanyi.

(Buakabuluibua 21:3-7)


© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>

Milayi ya Nzambi



Muanzankongolo ne tshipungidi tshia Nzambi ne Noa

Yehowa wakamona ne, Mibi ya bantu idi idiundadiunda munkatshi mua ba pa buloba ne meji adibo beta mu mitshima yabo adi mabi matuku onso. Yehowa wakamba ne, Nenjimije bantu banakafuka pa buloba ... kadi Noa wakasangana luse ku mesu kua Yehowa.

(Genese 6:5,7,8)

Bua ditabuja Noa, pakadiye mudimujibue bua malu akadi kaayi manze kumuenebua, muenzejibue ku ditshina dia Nzambi, wakalohgolola buatu bua kusungila nabu ba mu nzubu muende; bua bualu ebuka wakapisha ba pa buloba, wakalua mupianyi wa buakane budi bua ku ditabuja.

(Ebelu 11:7)

Nzambi wakambila Noa ne, Panatuma matutu mulu, muanzankongolo neumeneke mu matutu, nenvuluke tshipungidi tshianyi tshidi pankatshi petu ne bintu bionso bidi ne muoyo; ne mayi kaena avulangana kabidi bua kujimijawu bintu bionso.

(Genese 9:14,15)

Mulayi wa muoyo wa tshiendelele

Ne ebuka mbumanyishi ne, Nzambi wakatupa muoyo wa tshiendelele, ne muoyo ewu udi munda mua Muana wende. Udi ne Muana udi ne muoyo; udi kayi ne Muana wa Nzambi kena ne muoyo. Nakufunda malu aa kunudi, bua nuenu numanye ne, Tudi ne muoyo wa tshiendelele, kunudi nuenu badi bitabuja dina dia Muana wa Nzambi. Nunku kakueni dipila mpindiewu kudi badi mu Kilisto Yesu.

(1 Yone 5:11-13. Lomo 8:1)

Mukelenge Yesu Kilisto wakamba ne, Bulelela, bulelela, ndi nuambila ne, Umvua diyi dianyi, witabuja wakuntuma, udi ne muoyo wa tshiendelele, kena ulua ku tshilumbu, wakumuka mu lufu, wakubuela mu muoyo. Meme nakuluila bua bantu bapete muoyo, bapete muvule. Ndi mulami muimpe wa mikoko; mulami muimpe udi ufuila mikoko. Mikoko yanyi idi yumvua diyi dianyi, ndi muimanye, idi indonda; ndi nyipa muoyo wa tshiendelele; kayena ifua tshiendelele, kakueni mukuabo udi winyenga mu tshianza tshianyi.

(Yone 5:24. 10:10,11,27,28)

Nuteke ntatu yenu yonso kudi Nzambi, bualu bua Veye udi Unulubulula.

(1 Petelo 5:7)

Wakateleja matshu ende kundi, wakumvua muadi wanyi ... wakimanyika makasa anyi pa dibue, wakajadika biendedi bianyi. Wakateka musambu mupia-mupia mukana muanyi, musambu wa kutumbisha nawu Nzambi wetu. Apu meme panyi ndi mupele ne mukengi, kadi Mukelenge udi wela meji a bualu buanyi.

(Musambu 40:1-3,17)

Usankishe muoyo wa muntu webe, Mukelenge, bualu bua ndi ngambula mutshima wanyi kuudi. Bualu bua wewe, Mukelenge udi muimpe, ne mutshima webe udi musue kubuikidila bantu mibi yabo; udi muule tente ne luse lujalame kudi bonso badi bakubikila. Mu dituku dia dikenga dianyi nenkubikile; bualu bua wewe newitabe kundi. Kadi wewe, Mukelenge, udi Nzambi udi ufuila bantu luse ne diakalengele; udi ne lutulu ludi lukanda tshiji tshiebe, udi muule tente ne luse lujalame ne lulamatu lua bushuwa.

(Musambu 86:4,5,7,15)

Bualu bua badi ne bujitu bua mu mutshima

Mukelenge Yesu wakamba ne, Luayi kundi, bonso badi ne mudimu mukole, badi ne bujitu bunene, meme nenupe dikisha. Angatayi mutshi wanyi wa tshikokedi pa nshingu yenu, nuyile malu kundi; bualu bua meme ndi ne kalolo ne kanemu mu mutshima wanyi; nunku nenusangane dikisha mu mutshima yenu. Tshiena ngipata walua kundi.

(Matayo 11:28,29. Yone 6:37)

Mitshima yenu kayizakadi

Nuitabuje Nzambi, nungitabuje meme kabidi. Mu nzubu wa Tatu wanyi mudi miaba ya bungi ya kuikala; bu bualu ebuka kabuyi bulelela, nakadi kunuambila; nenyi kunulongoluela muaba. Bianaya ne binanulongoluela muaba, nempingane kabidi, nenuangate kundi meme muine, bua kundi ngikala, nuenu nenuikaleku kabidi. Ndi nushila ditalala, ndi nupa ditalala dianyi; tshiena nupadi bu mudi pa ba buloba banupadi. Mitshima yenu kayizakadi, kayitshinyi.

(Yone 14:1-3,27)